

DISSERTATIO INAUGVRALIS MEDICA
DE

IPECACUANHAE
VIRTUTE FEBRIFUGA
ATQVE ANTIDYSENTERICA

QVAM

PRAESIDE

DN. ABRAHAMO VATERO

PHIL. ET MED. DOCTORE ET PROF. PVBL.

ANATOM. ET BOTAN. SVBSTITVTO VT ET SOCIET.

IMPER. NAT. CVR. BRITANN.

SOCIO

PATRONO ATQVE PRAECEPTORE SVO

AETATEM DEVENERANDO

PRO LICENTIA

SVMMOS IN ARTE SALVTARI HONORES

CONSEQVENDI

D. *NOVEMBR. M DCC XXXII.*

DEMONSTRABIT

AVTOR RESPONDENS

IOHAN. GODOFREDVS FRITSCHIVS

MED. CAND. PRINENS. MISN.

HORIS ANTE ET POST MERIDIEM CONSVETIS.

VITEMBERGAE, PRELO SCHLOMACHIANO.



DISSERTATIO INAUGVRALIS MEDICA
DE
IPECACUANHAE
VIRTUTE FEBRIFUGA ATQVE
ANTIDYSENTERICA.

I.



Nihil magis incremento artis salutaris obfuit, nihilque magis rationalem medendi methodum labefactavit, quam peruersum de panaceis & remediis specificis praeiudicium. A sana sane alienum ratione, uno eodemque remedio in diversis discrepantis naturae subiectis integram valetudinem tueri & labefactatam reparare velle. Varia solidorum & fluidorum

dorum constitutio, varium vitae genus, discrepantes & multifariae morborum causae contrarium penitus innuunt. Clarius haec ex speciali sic dictarum panacearum examine perspiciemus, aliae enim harum sunt remedia mere terrea, uti sic dictorum pulverum cordialium exemplo constat, hi, uti in salis acidi excessu, scopo absorbendi, conveniunt, ita iidem in contraria causa merito reiiciendi. Durior censura de balsamis vitae astralibus & panaceis confortantibus ferenda, haec etenim sale volatili oleoso saturata, in morbis a serosa colluvie dependentibus saltem conducunt, in solidorum vero ariditate nimiaque rigiditate & particularum salino sulphurearum praedominio pessima sunt venena, & nimis irritando nervos resolvendoque succos vehementem aestum, sitim, haemorrhagias symptomáticas, sudorem colliquativum, aliaque mala inducunt.

II.

Idem iudicium de remediis specificis & sic dictis arcanis ferendum, quae vel certo visceri, vel certo morbo dicata esse, nonnulli temere affirmant. Nulla dantur specifica cephalica, thoracica, stomachalia, hepatica, cordialia, uterina, ac maxime absonum, unum idemque remedium in diversis aegrotis eodem morbo laborantibus, adhibere,

hibere, nam materia peccans non una eademque in omnibus est, nec sedes mali semper peraeque eadem; hoc innuit diversa morborum origo, hoc indicant varia, quibus huiusmodi aegroti affliguntur symptomata, idem ex vario remediorum adhibitorum effectu constat. Male itaque illi Medici & suae famae ac conscientiae & aegrotorum salutis prospiciunt & consulunt, qui sic dictis specificis in cura februm, epilepsiae, arthritidis & similium gravium morborum promiscue utuntur, atque ad eadem, tanquam ad sacram anchoram semper confugiunt. Meliore certe & certiore effectu curam huiusmodi affectuum susciperent, si rationali & sufficienti instituto examine, sedem atque indolem materiae peccantis perquirerent, illisque perspectis, origini & causis congrua & sufficientia accommodarent remedia. Non levis nec postrema causa, cur epilepsia, arthritis & similes morbi pro incurabilibus habentur, temerarius specificorum usus est, nam multorum Medicorum mos est, aegrotis, allegatis morbis laborantibus sua specifica antispasmodica, atque antarthritica exhibere, his nihil proficientibus, aut malo graviore penitus reddito, huiusmodi morbus incurabilis pronunciatur.

III.

Ex his quivis, quae sit mens nostra, de fe-
 A 3 bri

brifuga atque antidysenterica Ipecacuanhae virtute, colligere potest; Ipecacuanhae enim non specificam, multo minus universalem virtutem quasvis febres & quamvis curandi dysenteriam tribuimus, sed particularem saltem atque ad certos restrictam casus. Nam res est notissima atque in aprico posita, quod Ipecacuanha sit remedium lenem emeticum, quod suavissime vomitum ciet, & tuto atque absque omni periculo hypercatharseos exhiberi potest. Non solam igitur febrem & dysenteriam ex ventriculi cruditatibus provenientem, sed quosvis alios morbos, qui eandem agnoscunt originem, allegata radix curat. Operae dehinc pretium erit, ut in ipsa principia dicti, de quo disputamus, remedii, inquiramus, iisque detectis & demonstratis, in quam febrem & dysenteria conducat, indicemus atque explicemus.

IV.

Prolixior huius radices descriptio, quam apud LEMERY, POMET, PISONEM, KOENIGIVM, BOECLERVUM, VALENTINI aliosque materiae medicae auctores deprehendimus, minus necessaria. Ipecacuanhae tres ab allegatis auctoribus species allegantur, ex quibus una saltem apud nos in usum venit, haec vero Ipecacuanha nigra appellatur, atque e Brasilia ad nos defertur. Ra-
dix

dix est exilis exotica, digiti fere obtinens longitudinem, crassitie tenuiorem calamum scriptorium aequans, nodosa, flexuosa, inaequalis & quasi geniculata, contorta & plurimis rugis annularibus instructa, extus fusca, intus grisea, resinosa & pinguis, unde masticata saporem subacrem & quodammodo amarum excitat. De Ipecacuanha alba, quae Blanca Lusitanis dicitur, & apud nos rarior ac minus usualis est; de flava itidem, quae uti POMET commemorat, ex Peru per Hispanos, quibus Bexugillo vocatur, nihil hic dicendum, quippe quae radices tanquam nobis ignotae, & quarum virtus nondum satis detecta & probata, ad nostrum scopum non pertinent.

V.

Ex iis autem, quæ in Ipecacuanhæ nobis usitatæ descriptione adduximus, iam liquet, quod eadem sal, una cum particulis sulphureis substantiæ terreæ inclusis, possideat. Analyfi chymica, uti KOENIGIVS *Regn. Veget. Sect. 4. p. 878.* docet, Ipecacuanha sal acidum oleo & terrae involutum prae-
bet. Ex eadem radice BOVLEDVC aqua pluvia destillata multum salis, & spiritu vini copiosas particulas resinosas extraxit, uti DV HAMEL *Hist. Reg. scient. Acad. p. 579.* annotavit. Idem confirmat experimentum WEDELI, qui ex Ipecacuanhae unciiis tribus

bus retortae vitreae accommodae inditis, ope destillationis ex igne arenae, primum liquorem coloratum obscuriore flavedine praeditum, ari spiritui acrimonia similem & leviter quoque acidulum acquisivit, qui cum spiritu tartari in cochleari combinatus, lenem effervescentiam, liquori vero martiali affusus, atro rubentem mixturam produxit. Deinceps atque ultimo loco oleum prodiit empyrevmaticum instar olei tartari crassum, foetens & hinc naribus exosum. Ex capite mortuo praevia, intimiore & perfecta calcinatione, ex lixivio filtrato atque ad crystallisationem loco frigido reposito, modicum quoque salis lixivii fuit impetratum.

VI.

Virtus itaque huius radice a particulis volatilibus & fixis, quibus constat, dependet, illarum intuitu acris, nauseosa atque emetica, harum vero, adstringens & roborans est. Nec in omnibus subiectis vim emeticam exerit, sed in nonnullis saltem alvum movet. Ac dantur homines, qui ad dimidiam drachmam Ipecacuanham pulverisatam absque succedente vomitu, vel alvi deiectione, adhibuerunt, in his vero uberiores transpirationem excitavit. Triplex praecipue virtus Ipecacuanhae, nempe 1) emetica, 2) alexipharmaca & 3) adstringens tribuitur, has vero vires ab iis, quas

quas adduximus particulis, obtinet. Maxima vero, si operationem respicimus inter Ipecacuanham & rhabarbarum intercedit convenientia, uti enim rhabarbarum alvum prius laxat & purgat, ac deinceps adstringit, ita pariter Ipecacuanha, post expurgationem vomitu vel alvina factam deiectione, ventriculum atque intestina roborat, unde quoque eadem promptissimae est operationis, & brevi nausea ac vomitus cum totius corporis emolumento cessat. Vt paucis totam rem complectar, Ipecacuanha 1) lene est emeticum, uti plurimorum, qui hac radice usi fuerunt, experientia constat, 2) temperatum resolvens, quod tum ex effectu, tum ex principiis probatur, 3) subadstringens atque absorbens, quod praeter observationes clinicas, substantia huius terrea demonstrat.

VII.

His evictis perfacile est iudicatu, in quam febre & dysenteria Ipecacuanha conducatur. Primum Ipecacuanhae usum in febribus enodabimus, deinceps ad dysenteriam progrediemur. Vix ququam fore credo, qui Ipecacuanham in febrium intermittantium cura non laudet; non autem in intermittentibus saltem, sed in continuis quoque iisque malignis eius usus persaepe salutaris est, quod probe agnovit CL. BOECLERVS, qui in Cynosu-

ra Materiae Medicae continuata Part. I. Cap. I. p. 61. frequentibus sententiam nostram confirmat: *maxime quoque convenit haec radix in febribus intermittentibus, ubi purgatione opus est, & quidem citra recidivae metum, sive in substantia, sive in infuso exhibeatur. Nec dubitandum etiam in aliis pariter febribus continuis, ardentibus imprimis malignis diarrhoeam in specie coniunctam habentibus, egregie convenire, cum materiam peccantem per vomitum expellendo non solummodo diarrhoeam sistere, sed & cardialgiam aliaque symptomata allevare valeat. Accedit insuper vis eiusdem alexipharmaca. Cum hoc consentit KOENIGIVS, qui Regn. Veget. Sect. IV. p. 879. haec de febrifuga Ipecacuanhae virtute affert: notabile vero atque in praxi maxime proficuum est, quod eadem radix in febribus intermittentibus insigniter conveniat, ubi opus est purgatione & quidem citra recidivae metum, quam cortici Peruviano vulgo tribuunt, uti ex propria experientia comprobat Hermannus, qui in tali casu Ipecacuanham tum in substantia, tum in infuso feliciter semper praescripsit. Minime vero uti iam §. antecedenti III. indicatum, promiscue in quavis febre, Ipecacuanha adhibenda, sed in ea saltem, quae sive intermittens, sive continua sit, ex ventriculi cruditatibus originem habet.*

VIII.

Illi quidem etiam in hoc casu, Ipecacuanhae
usum

usum reiicient, quibus quaevis emetica tanquam pessima venena exosa sunt, ast illi minus sciunt distinguere inter usum atque abusum; praeterea ab iisdem emetica vehementia & periculosa cum lenioribus & tutis confunduntur. Hoc utique certum, quod multi ex usu emeticorum drasticorum, qualia mercurius vitae, vitrum antimonii, crocus metallorum, praematura, gravissimis symptomatibus excruciat, morte perierint. Ast hoc minus, a legitimo Ipecacuanhae usu expectandum, tam leniter enim & tam promte agit, ut infantibus adhuc in cunis existentibus, tuto imo cum maximo emolumento exhiberi possit. Cumque tam benigne agat, in epilepsia, suffarctu, asthmate aliisque pectoris affectibus, quibus haud raro multi afficiuntur infantes optimo cum successu praescribitur. *Non suffuratur inquit KOENIGIVS l. 5 l. c. p. 881. Ipecacuanha vires, vel depauperat, sed conservat & liberat, unaque sic mineram depurgat, ne peius aliquod symptoma timendum sit.* Ea de causa non tantum in Belgio, sed in aliis quoque regionibus allegatae radicis usus Medicis prudentibus in cura februm intermittentium & continuarum, ubi indicationes vomendi praesto sunt, frequens est.

IX.

Probe autem, antequam Ipecacuanhae usum
B 2 prae-

praescribis, febris originem, sedem & materiam peccantem examines; non enim eadem in alio casu exhibenda, quam ubi sufficientia vomitus instituendi indicia adsunt. In illis igitur febribus, quarum origo & sedes in ventriculo haeret, Ipecacuanha conducit. Omnes febres, hic multi regerent, ex ventriculo ortum ducere, adeoque in omni febre, cum primis intermittente, allegatae radice usum convenire. Ast error ille gravis admodum atque in Praxi medica haud tolerandus; quot enim tempore autumnali in febres praesertim catarrhales, ex sola suppressa transpiratione insensibili incidunt? quot febribus ex sanguinis abundantia afficiuntur? quot ob suppressum fluxum haemorrhoidalem vel menstruum tam intermittentibus, quam continuis corripuntur? quot eandem calamitatem ob viscerum inflammationem, exulcerationem, obstructionem aut scirrhum pati tenentur? Vti autem ex his satis liquet, quod omnis febris origo non ex ventriculo atque intestinis deducenda, ita minime cum salutari effectum Ipecacuanha in omni febre praescribi potest.

X.

Atque ea, quae modo commemoravi non solum in cura febrium continuarum, sed intermittentium quoque tenenda. Maiore certe cum circumspectione

spectione Ipecacuanha in continuis, quam intermittentibus adhibenda, interim tamen, si sufficientia adsunt indicantia, nullaque obstant contraindicationia, si praesertim morbi adest principium, eandem radicem optimo cum successu exhibere, ipsumque morbum avertere possumus. Hoc egregie illustrari potest historia, quam KOENIGIVS l. c. p. 881. in medium producit, *iuvēnis*, inquit ille, *viginti quatuor annorum a potu vini Hispanici calore praeternaturali, dolore praecordiorum, capitis & dorsi cum siti correptus, exhibita dosi Ipecacuanhae mox levatus, optime habebat.* In tali igitur casu, ubi materia peccans adhuc in primis viis haeret, & febris continua nondum ad *ἀνέναν* vel *ἀνάν* pervenit, Ipecacuanha conducit, si vero febris exanthematica, variolacea, morbillosa aut similis adest, si deinceps morbi augmentum aut status plane adest, Hippocratis monitum observandum: quicquid movendum, in principio movendum, in statu praestat quietem habere.

XI.

In febribus vero intermittentibus, si collectarum in ventriculo cruditatum indicia adsunt, quovis, excepto paroxysmi tempore, exhibenda Ipecacuanha. Praecipue exoptatus effectus ab illius usu expectandus, si aliquot horas ante paroxysmum

B 3

exhi-

exhibetur. Datur ordinario Ipecacuanha in substantia a scrupulo uno ad dimidiam drachmam in infuso Theae, vel Thee Boy; melius autem eandem operari animadverti, si eandem pulverisatam per noctis spatium in vino malvatico vel hispanico digerimus, & deinceps una cum vino propinamus. Alii solum Ipecacuanhae infusum commendant, sed idem nimis debile, nec ad cruditates ventriculi removendas sufficientes possidet vires, praecipue in phlegmaticis, ubi pituita crassior peccat; nam in tali statu ne quidem Ipecacuanha in substantia exhibita sufficit, sed necessarium, ut ad augendas illius vires, unum alterumve granum tartari emetici addatur. In iis vero, qui facile vomunt, ubi cruditates mobiles & satis praeparatae, meliore cum effectū sola Ipecacuanha praescribitur; nam ab usu tartari emetici non vehementes modo vomitus alvinaeque eiectiones, sed haud raro etiam hypercatharsis, imo passio cholericā cum cardialgia, animi deliquio & summa virium prostratione, excitantur, quod nunquam, si solam exhibes Ipecacuanham eveniet.

XII.

Praecipue sola Ipecacuanha in febribus cum diarrhoea, vel dysenteria coniunctis exhibenda, penitusque hic reiiciendus tartarus emeticus. Atque
hoc

hoc eo maiore cum sedulitate & circumspectione observandum, si dysenteria est morbus idiopathicus. Ante omnia vero hic eorum examinanda sententia, qui Ipecacuanham pro remedio universalis in omni dysenteria habent. Ex eorum numero est PISO, qui in *Hist. Nat. Brasil. lib. IV, cap. 53. & lib. V. cap. 19.* refert, quod in his terris praesentius & praestantius remedium adversus plurimos morbos cum primis diarrhoeam & dysenteriam non inveniatur. Magis adhuc in cura dysenteriae virtutem Ipecacuanhae celebrat VALENTINI Polycbrest. Exot. p. 22. sequentibus usus: *quam maxime autem in quibusvis alvi fluxibus, dysentericis imprimis compescendis, se admirandam praebet, quod expertus testor, cum non materiam solum morbificam, ut ut tenacissimam, a parte affecta revellat, eamque per superiora, ut plurimum expellat, sed & adstringendo viscerum tonum restituat.* Hoc enim prae omnibus adstringentibus habet peculiare, quod antequam fluxum sistat, vomitum prius moveat, ut rhabarbarum prius laxare solet, quam adstringere. Quid? quod! & virtute alexiteria miasma dysentericum per poros cutis exterminet, adeoque triplici ratione ad morbum hunc subigendum conducat, vomitum prius, abhinc sudorem & tertio adstrictionem causando. Tanti plane TOURNEFORT allegatam radicem in dysenteriae cura aestimat, ut non vereatur, secundum Pometi, in suo

fuο libro, qui dicitur, *Der aufrichtige Materialist Part. I. lib. 2. cap. 1. p. m. 56. & 57.* testimonium affirmare; nullum remedium adhuc notum esse, quod tam cito ac tam tuto, quam quidem Ipecacuanha, dysenteriam curet. Idem, eodem loco paulo supra, allegatam radicem pro sufficienti remedio in dysenteria inveterata, ubi a materia acriam erosum atque exulceratum est intestinum restum agnoscit.

XIII.

Verum enim vero, licet concedere tenear, plures dari casus aegrotantium diarrhoea & dysenteria affectarum, ubi Ipecacuanhae usus maxime proficuus & salutaris, imo necessarius. Minime autem a particulari ad universale concludere licet, quo minus enim credamus, in omni dysenteria Ipecacuanham conducere, sana ratio, una cum quotidiana experientia docet. Hoc multi iam animadverterunt, atque ea de causa in huius usu debitam circumspectionem adhibendam esse, sedulo monuerunt. Ex eorum numero sunt BOECLERVS & POMET, quorum prior sequentes cautelas praescribit: *non temere, inquit, quibusvis aegris Ipecacuanha dari, & absque insigni praemeditatione nemo ea abuti debet, violento enim etiam, ut cetera vomitoria, motu agit. Ante omnia probe ponderandum,*

an e re , cum aegri , tum ipsius medici , sit , exhibere hoc remedium. Dantur enim casus , ubi merito ab eo abstinere decet , ne remedio enecuisse videamur , quem fors aut materia occiderat. Fieri hoc posset in iis , quibus nimia diuturnitate delirium , singultus , vomitus cum tensione dolorifica in infimo ventre , deiectionibus , fecibus vini aut loturae carniū similibus , cadaverosi odoris , oborta sunt , quae cum certa sint gangraenae intestina corripientis indicia , hinc frustra illos salutem speraturos censet HELVETIVS , huius remedii restaurator , qui & Phthisicos , atrophia laborantes , eosque , quibus insignis iam corruptio in infimo ventre accidit , a numero hac arte sanabilium excipit , quoniam fluxus ventris his superveniens caloris nativi extinctionem & propinquam mortem indicare , in praxi observatur. Non autem in eo saltem casu , cuius BOECLERVS facit mentionem Ipecacuanhae usus exulare debet , sed plures dantur alii , ubi & alia remedia , & alia methodus , necessaria sunt. Ingenue hoc fatetur LEMERY *Lexico Mat. Med. p. m. 580. & 581.* qui frequenter sine ullo emolumento , detrimento potius , Ipecacuanham in dysenteriae cura adhibitam fuisse , refert , & ea de causa monet , ut , si post tertiam dosin malum non leniatur , aut penitus tollatur , Medicus prudens ab ulteriore Ipecacuanhae usu abstineat , formataque rationali indicatione , alia adhibeat remedia.

XIV.

Cum itaque non in quavis diarrhoea & dysenteria conducat Ipecacuanha , ex specialibus casibus & rationali causae & sedis dysenteriae examine , ubi eadem vel reijicienda , vel adhibenda , demonstrare decet. Non unam vero eandemque semper dysenteriae originem esse , omnibus prudentibus Medicis est in confesso , atque idem tot observationes clinicae atque anatomico-pathologicae probant. Maximum pariter discrimen inter indolem materiae dysenteriam excitantis intercedit. Alia dehinc ratione curanda dysenteria , quae ex comestis fructibus ,

C

aut

aut aliis cibis acribus, ortum duxit; alia necessaria sunt, si dysenteriae origo a suppressa transpiratione insensibili dependet; mutanda iterum methodus medendi in dysenteria, suppressi fluxus menstrui vel haemorrhoidalis effectu; ac hoc pariter observandum in dysenteria, quae ulcus intestinorum sequitur. Praecipue dysenteria accurate a fluxu haemorrhoidali & hepatico distinguenda; in illo enim Ipecacuanhae usum minus proficuum esse, observationes plures probant. His addenda varia peccantis materiae indoles, quae hic ante omnia a prudenti Medico indaganda & detegenda; interdum salis alcalini, interdum acidi acrimonia & virulentia in culpa est; quandoque copia bilis, vel mala illius qualitas accusanda; nonnunquam visciditas, cui salia acria inhaerent, peccat; haud raro deglutitum arsenicum aliaque similis indolis venena dysenteriam excitarunt.

XV.

Ex his cum principiis & viribus Ipecacuanhae collatis, haud difficile erit indicare & probare, in quonam casu Ipecacuanha conveniat. Talis vero erit, si aliquis ex perversa victus vivendique ratione, ex comestis fructibus acribus, hausto musto recenti, aut aliorum malae qualitatis alimentorum & potulentorum deglutitione, & hinc accumulatis in ventriculo totoque canale alimentorum cruditatibus, in dysenteriam incidit; in tali enim rerum statu, cum morbi sentina in ventriculo haereat, cum ex eodem continuus intestinis suppeditetur fomes, novaque materia peccans, nullum praestantius Ipecacuanha remedium habemus; huius enim subsidio causa mali immediate ex parte affecta removetur, inversoque motu peristaltico, stimulus & motus convulsivus in intestinis sedatur, & excretiones alvinae parciores fiunt. Hic, si materia peccans simul & semel removeri nequit, altera Ipecacuanhae dosi desideratur; ac hoc pariter est BOECLERI l. c. consilium, qui, si a prima dosi malum non sistatur, altero die secun-

secundam, sed paululum imminutam, & si opus est, tertiam quoque adhibendam esse, monet. Per os vero adhibenda Ipecacuanha, minime in clysteribus, quibus a multis alias addi solet; docuit enim experientia, uti ingenue BOECLERVS & LEMERY *L. L. c. c.* fatentur, quod frustraneus, imo noxius quandoque Ipecacuanhae usus in clysteribus. Melius quoque hic operatur Ipecacuanha in substantia praescripta, quam in infuso vel decocto usurpata. Et illi quoque minus felices sunt, qui alia remedia, quibus virtutem allegatae radiceis aemulari intendunt, substituunt; audiendus hic TOVRNEFORTIVS, quidam, inquiens, vires Ipecacuanhae aemulari tentarunt, decocto tormentillae, bistortae & ceterarum radicum adstringentium, addendo vinum emeticum, aut tartarum emeticum, sed expectationi successus plane non respondet, & si res feliciter succedat, emetico potius, quam decocto curatio tribui debet, nullus enim ignorat, quin ab emetico saepe dysenteria tollatur.

XVI.

Quemadmodum vero in eo, quem proposui, casu, Ipecacuanhae usus maxime salutaris, ita eadem funestam edet operationem, si ventriculus insans atque ab omnibus liber cruditatibus existit, ac dysenteria ab intestinorum ulcere ortum duxit; decocta potius traumatica atque abstergentia, ac deinceps oleosa & balsamica exhibenda. Eadem cautela tenenda in dysenteria, quae suppressam perspirationem secuta, nam praeter absorbentia & gelatinosa, temperata diaphoretica adhibenda, & deinceps ope martialium & opiatorum augenda in intestinis resistantia, quo succorum vitalium affluxus ad externam corporis peripheriam promoveatur. Ac, quem latet, in dysenteria, quae a plethora & suppressa excretionem solenni provenit, summam venae sectionis, nullam vero Ipecacuanhae aliorumque emeticorum esse utilitatem. Concedere quidem teneor, praeter salia stimulantia, substantiam terream in Ipecacuanha adesse, tanta vero illius virtus non est, ut ad plethoram
immi-

imminuendam, ad perspirationem promovendam, ac deinceps ad mundificandum & consolidandum ulcus sufficiat, praecipue cum maxima illius virtus in sale acri stimulante consistat; quo motus convulsivus intestinorum, mutuusque attritus atque erosio augentur.

XVII.

Haec quoque attingere fas atque aequum iudico, quod interdum ad dysenteriae curam sola sufficiat Ipecacuanha; hoc vero continget, si tota morbi colluvies adhuc in ventriculo haeret. Saepe vero, licet mali sedes in ventriculo haereat, alia post evacuationem Ipecacuanhae usu peractam, necessaria sunt; cum primis, si impensior cruditatum acrimonia peccat, quae nimia irritatione convulsivum intestinorum motum excitant, tunc opiata balsamicis iuncta, v. g. tinctura balsami peruviani spiritu nitri dulci parata cum essentia opii; clysteres pariter anodynii ex vitellis ovi, lacte, therebintina pura & oleo olivarum parati, maxime conducunt. Non saltem vero ratio, sed experientia quoque docet, quod licet conveniens fuerit Ipecacuanhae usus, idem tamen ad dysenteriae curam non suffecerit. Ita puer apud KOENIGIVM l. c., qui duorum cum semisse annorum erat, a dysenteria liberatus fuit, primum Ipecacuanhae, deinceps theriacalium usu. Eadem methodus, in foemina triginta annorum, cuius allegatus Autor pariter mentionem iniicit, adhibita fuit. Hac quoque ratione iuvenis viginti trium annorum, primum nempe Ipecacuanham, & deinde theriacalia seu opiata praescribendo, curatus fuit. Quid pluribus opus, ad dysenteriae curam sola ventriculi expurgatio haud sufficit, sed huic alia adhuc subsidia adiungenda, quorum adiumento materia acris temperatur atque implicatur, motus intestinorum convulsivus sedatur, impuritatum affluxus impeditur atque intestina erosa consolidantur; si enim ea procedimus, exoptatus semper expectandus medelae

F I N I S.